



МОНГОЛ УЛСЫН БОЛОВСРОЛ,  
СОЁЛ, ШИНЖЛЭХ УХААН, СПОРТЫН  
САЙДЫН ТУШААЛ

2019 оны 06 сарын 13 өдөр

Дугаар А/390

Улаанбаатар хот

Сургалтын хөтөлбөр шинэчлэн батлах тухай

Монгол Улсын Засгийн газрын тухай хуулийн 24 дүгээр зүйлийн 24.2 дахь хэсэг, Боловсролын тухай хуулийн 28 дугаар зүйлийн 28.1.2 дахь заалт, "Тогтвортой хөгжил-Ерөнхий боловсрол" багш нарын улсын хоёрдугаар зөвлөгөөнд оролцогчдын санал, зөвлөмж, "Бага, дунд боловсролын сургалтын цөм хөтөлбөр" үндэсний хэлэлцүүлэгт оролцогчдын санал, дүгнэлт, Монголын багш нарын VII их хурлын төлөөлөгчдийн санал, дүгнэлтийг тус тус үндэслэн ТУШААХ нь:

1. Ерөнхий боловсролын сургуулийн 1-12 дугаар ангийн суралцагчдын судлах "Иргэний ёс зүйн боловсрол" сургалтын хөтөлбөрийг хавсралт ёсоор шинэчлэн баталсугай.

2. "Иргэний ёс зүйн боловсрол" сургалтын хөтөлбөрийг өмчийн хэлбэр үл харгалзан ерөнхий боловсролын нийт сургуульд 2019-2020 оны хичээлийн жилээс эхлэн хэрэгжүүлсүгэй.

3. Сургалтын хөтөлбөрийн хэрэгжилтийг мэргэжил, арга зүйн удирдлагаар хангаж ажиллахыг Ерөнхий боловсролын бодлогын газар /Т.Ням-Очир/, Боловсролын хүрээлэн /П.Лхагвасүрэн/, хөтөлбөрийг чанартай хэрэгжүүлж ажиллахыг аймгийн Боловсрол, соёл, урлагийн газар, нийслэлийн Боловсролын газар, ерөнхий боловсролын сургуулийн захирал нарт тус тус даалгасугай.

4. "Иргэний ёс зүйн боловсрол" сургалтын хөтөлбөрийг хэрэгжүүлэхтэй холбогдуулан Боловсрол, шинжлэх ухааны сайдын 2014 оны "Сургалтын төлөвлөгөө, цөм хөтөлбөр, багийн бүрэлдэхүүн батлах тухай" А/240 дүгээр тушаалын хоёрдугаар хавсралтаар батлагдсан "Бага боловсролын сургалтын цөм хөтөлбөрийн" 6.1, 6.2-т заасан "Иргэний боловсрол" хэсэгт хамаарах хэсгийг, Боловсрол, соёл, шинжлэх ухааны сайдын 2015 оны "Сургалтын цөм хөтөлбөр батлах тухай" А/302 дугаар тушаалын нэгдүгээр хавсралтаар батлагдсан "Суурь боловсролын сургалтын цөм хөтөлбөрийн" "Иргэний боловсрол" хэсэгт хамаарах хэсгийг тус тус хүчингүй болсонд тооцсугай.

САЙД  Ё.БААТАРБИЛЭГ

301156

Боловсрол, соёл, шинжлэх ухаан, спортын сайдын  
2019 оны 06 дугаар сарын 13 -ны өдрийн  
А/390 дугаар тушаалын хавсралт

## **“ИРГЭНИЙ ЁС ЗҮЙН БОЛОВСРОЛ” СУРГАЛТЫН ХӨТӨЛБӨР**

### **Нэг. Нийтлэг үндэслэл**

"Бага, дунд боловсролын тухай хууль"-ийн бага, суурь, бүрэн дунд боловсролын зорилгод "Эх хэлний суурь чадамжтай монгол хүүхэд төлөвшүүлэх, бие даан шийдвэр гаргах, бүтээлчээр суралцах чадамжтай иргэн төлөвшүүлэх..." гэж заасан байна. Мөн бага, суурь, бүрэн дунд боловсролын агуулгаар сурагчдад "... ёс заншил, соёлын өв уламжлалын зохих шатны мэдлэг, чадвар эзэмшүүлэх; өөрийн болон бусдын хөдөлмөрийг хүндэтгэх, үнэнч шударга, хамтач байдлыг эрхэмлэх үзэл төлөвшүүлэх; ёс суртахууны соёлтой, иргэний үүргээ ухамсарласан, харилцааны ур чадвартай, энэрэнгүй, эх оронч, хууль ёсыг дээдлэн сахидаг, соёлын үнэт зүйлсийг хүндлэн хайрладаг болгон төлөвшүүлэх; гэр бүлийн амьдралын анхан шатны ойлголт эзэмшүүлэх; зөрчлийг хүчирхийллийн бус аргаар шийдвэрлэх, бие даан амьдарч, хөдөлмөрлөх чадвар эзэмшүүлэх" гэж заажээ.

Монгол Улсын Засгийн Газрын 2016-2020 оны үйл ажиллагааны хөтөлбөрт "Сургуулийг хүн хөгжлийн төв болгоно. Сургууль хүүхдэд мэдлэг боловсрол, чадвар олгодог төдийгүй эрүүл чийрэг, эерэг зан суртахуун, хүмүүжил, төлөвшилтэй, амьдрах ухаантай, эх оронч, үндэсний бахархалтай хүн болоход нь тусалдаг болно" гэсэн зорилт дэвшүүлсэн билээ. Уг зорилтыг "Сургалтын хөтөлбөр, сурах бичгийн агуулга, чанарыг дэлхий нийтийн хөгжлийн чиг хандлага, өөрийн орны түүх, соёл, өв уламжлалд тулгуурлан шинэчилэх; ерөнхий боловсролын сургуулийн сургалтын төлөвлөгөөнд эх орныхоо түүх соёлыг судлах хичээлийг оруулах; сургалтын хөтөлбөрт хүүхдийг хүнлэг, эх оронч, үндэсний ухамсар, бахархалтай, эх орноо хайрладаг, хүрээлэн байгаа орчноо хамгаалдаг, харилцааны зөв хэвшилтэй, бусдыг хүндэлдэг, хариуцлагатай, амьдрах ухаантай, итгэл даах чадвартай иргэн болгон төлөвшүүлэх агуулгыг тусган хэрэгжүүлэх" зэрэг үйл ажиллагааг хэрэгжүүлэхээр төлөвлөсөн юм.

Бага, дунд боловсролын зорилго, агуулга болон дээрх зорилттой сурагчдын эзэмшсэн ерөнхий боловсрол нийцэхгүй байгааг багш нар өнөөдөр хэлж байна.

Монголын багш нарын VII их хурлын тогтоолд "Сургалтын бодлогыг хүүхэд бүр монгол хэл, түүх, соёл, ёс заншил, өв уламжлалыг өвлөх, хөгжүүлэхэд чиглүүлэх, бүх шатны боловсролын байгууллага нь хүүхдийн хүмүүжил, төлөвшлийн төлөө үүрэг, хариуцлага хүлээдэг хууль, эрх зүйн орчин бий болгох, эцэг эх, асран хамгаалагчийн хүүхдийнхээ хөгжил, төлөвшил, хүмүүжил, хичээл, сургалтад анхаарал хандуулж, сургууль, багшид дэмжлэг үзүүлж, хамтран ажиллах журамт үүргийг хуульчлах, улмаар багшийн ёс зүйн боловсролыг дээшлүүлэх, нийгэмд зөв үлгэр дуурайл үзүүлж, хөгжлийг түүчээлэх, салбарын үнэт зүйл, харилцаа, хандлагын сайн жишгийг тогтоох ..." хэмээн дурджээ.